

# INUIT ATAQATIGIIT

## Inatsisartuni



Aasiaat 30.december 2018

UPA2019/47

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matumuuna saqqummiuppara:

**2020-mut aningaasanut inatsimmi ukiuni sisamani ukiumut 6 mio. kr-inik immikkut misileraalluni aningaasaliissuteqarnissamik Naalakkersuisut peqquneqarnissaannut Inatsisartuni aalajangiiffigisassatut siunnersuut. Suliniummut aningaasaliissutit 2020-mit meeqqanut inuuusuttunullu sumiginakkanut qimarnuinnik (isumassuivinik) pilersitsinermik misiligtutut suliniutinut sukumiisunut qinnuteqarnikkut kommuninut atugassanngortinneqassapput.**

(Inatsisartuni ilaasortaq Peter Olsen, Inuit Ataqatigiit)

### Tunngavilersuut:

Naluneqanngitsutut ukiuni kingullerni angerlarsimaffipparujussuarni sumi tamaani meeqqanik eqqissiviilliorttsinerit sumiginnaanerillu ajoraluartumik tusarsaagaluttuinnarput. Tamanna ajorluinnarpoq akuersaarneqarsinnaanngilarlu. Meerartavut taama atugaqartikkusunnangeqaat, naalakkersuinikkullu suliaqartuusugut, meerartatsinnik sumiginnaaneq angerlarsimaffinnilu eqqissiviilliorttsisarnerit sukkut tamatigut pinaveersaarttuartariaqarpavut. Meerartatsinnik illersuinerput sukkut tamatigut annertusartusarlugulu pitsangorsartuariariaqarpavut.

Meeqqat sumiginakkat pillugit periusissiortoqarnissaa ajunngilluinnarpoq, imigassamillu pisisinnaanerup aammalu piseqqusaarutinik killersuiniarnerit aqqtigalugit meeqqanik illersuiniarneq ajunngikkaluarpoq, kisianni taaku kisiisa aqqtigalugit pitsaliuiniarneq isumaqarpunga aqutissaanngitsoq naammanngilluinnartorlu.

Meeqqat navialisinnejarsinnaanissamut inissisimasut ulluunerani pisortat ingerlatsiviini isumagineqartarput atuarfinniuppat, meeqqerivinni sunngiffimmilu ornittakkani. Meeqqalliuku angajoqqaamik imernerisigut allatigulluunniit sumiginnarneqarnerminnikkut kaatsinnejarnermikkut allatigulluunniit navialisinnejarsinnaanerusartut pisortat ingerlatsiviisa matoqqanerisa nalaanni, matoqqanerisalu nalaanni nalaataqartoqarsimatillugu pisortanit isumaginnittussaq ataasinnaasarpooq oqarasuaatikkut attavigineqariaannaq, allatut oqaatigalugu sumiginnaaneq annerpaaq pisarpoq inooqatigiinni ajutuuinnermi ikuutaasinnaasut matoqqanerisa nalaanni.

Meeqqat illersorneqarnissaannut tamakkiisumik inerititsisinnaanngilagut unnuukut meeqqat illersortissaalatsinerpaaffianni imminnut isumagisassanngorfianni aaqqissuussaasumik qimarguivigisinnaasaannik pilersitsisoqanngippat.

2014 nalunaarusiami “Meeqqanut inuuusuttunullu inissinnejarsimasunut iliuusissatut

pilersaarutit qulaajaaffigineqarnerat<sup>1</sup> pinasuartumik inissiinerit 2014-ip qaammaatani pingasuni siullerni 160-inik amerlassuseqarsimapput. Taamatullu aamma §37 aqqutigalugit apeqqutigisimasanni nr. 2018-010<sup>2</sup> akissutigineqartuni takuneqarsinnaavoq angerlarsimaffinni meerartaqarfiusuni eqqissiviilliorfiunerpaa simasut Nuuk, Tasiilaq, Sisimiut, Aasiaat, Ilulissat aamma Qaqortoq. Illoqarfii pineqartut meeqqanut qimarnguisinnaasunik (isumassuiviit) pilersitsiortorfiginerisigut iluaqtissaqarfiulluarsinnaanissaat takorloorneqarsinnaavoq.

Isumaginnittooqarfinni suliassaqarfioreeqisuni sulisut ataasiakkaat unnukkut soialvagt-ini taasakkaani ullaamiit sulereernerup kingorna sulisussianngortitat atornagit ajortoqartillugu immikkut suleqatigiit amerlasuut unnuKKuinnaq sulisussanik pilersitsinikkut immikkut ajortoqarfiani qimarnguvigineqarsinnaasuni politiinut ilaqua sunnullu attaviginnittartussatut suliaqartussat ilaatigut meeqqanik angajoqqaarsiaagallartussanik unnuiffissarsiussinani unnuiffiusinnaasussaani pilersitsinissaq uani anguniagaavoq. Minnerungitsumillu pisortat inatsisitigut pisussaaffeqartut akornini attaveqaqatigiinnerlunnerit meeqqamut kingunerlutitsiviusunik annikillisaqataasussat.

Suliassanut ilaasinnaavoq uummaarissumik ersarissumillu suleriuseqarnissaq qimarnguiit (isumassuiviit) isumannaassallugu, tamannalu aamma politiinut attaveqarluarnissamut iluaquitaalluarsinnaavoq.

Oqaloqatigiinneq isumassuineq, siunnersuinerlu pitsaliuinissamut aamma aqqutissat pingarnerit pitsaanerillu aamma ilagilluinnarmassuk.

Anigaasat killeqarput kommunillu pisariaqartitsisinnaasut misiliutitullu pilersitserusussinnaasut amerlariaannaapput. Taamaammat immikkut misiliutit pilersitsinissamut qinnuteqaasiortoqartassaaq taavalu qinnuteqartut immikkut aningaasaleeqaataasarnissaannik piumasaqaateqartariaqassalluni. Takorloorneqarsinnaavoq anuingaasartutissanut agguaaqatigiinissaq 60/40 atorneqarsinnaassasoq, Namminersorlutik Oqartussat/Kommuni, agguaaqatigiisinnerisalu naleqqunnerusinnaasumik inissiisoqarsinnaanissaanik naliliisoqassappat ammaffigisinnaavara.

Taamatut suliniutini annermik meeqqat pineqartillugit pingaaruteqarluinnarpooq orniguffiusinnaasussani ataqaqatigiissaalluareersimanissamik aaqqissussaassoqareersimanissaa, inssisimaffissaat piinnarnagpit kisianni aamma suliani ersissunik maleruagaqarnissaq sulisussanik pikkorissarluakkanilli aamma peqarnissaq. Taamaammat kommunit misileraanermi pilersaarusi amik nassuaateqarlutik qinnuteqaateqqaarlutik aaqqiissuussereersimanissamik isumannaarinarnissaq anguniarlugu.

Eqqarsaataavoq una immikkut ittumik iliuuseqarneq, misileraanerup qaangiutilernerani nalilersuiffigineqarumaarnissaq.

Uuma siunnersuutaasup akuersissutigineqarneratigut, Kommunit meeqqanik tapersersuinissaq pillugu inatsisartut inatsisissaannik nr. 20, 26. juni 2017-meersumik malitsitsisussaatitaanerannik akisussaasuunerannillu arsaassanngilaat.

<sup>1</sup> <https://naalakkersuisut.gl/~media/Nanoq/Files/Publications/Familie/GL/Meeqqanut%20inuu suttunullu%20inissineqarsimunut%20iliuusissatut%20pilersaarutit%20qulaajaaffigineqarnerat.pdf>

<sup>2</sup> [https://ina.gl/documents/para3637/2018/svar/010\\_2018\\_Unnuarissat\\_peol\\_akissut.pdf](https://ina.gl/documents/para3637/2018/svar/010_2018_Unnuarissat_peol_akissut.pdf)

Meerartatsinnik isumassueriaaserput illersueriaaserpullu eqqarsaatigalugu, eqqarsaatigisariaqarparput qanoq pitsaanerulerlatalu pikkorinnerulissanerluta.

Meerartavut nerunnermik, asanninnermik assanillu kialaartunik tunineqarnissaannik kissaap-pakka.

### **Pisortanut aningaasatigut allaffissornikkullu kingunerisassai:**

2020-mut Aningaasanut Inatsisissami aningaasat akuersissutaasussat 6.mio.kr-niupput, ukiuni sisamani atuuttussiaassallutik. Atuutinnejarnerani immikkut suliniuteqarnermi aningaasartutissanut avitseqatigiinneq 60/40 (Namm.Oqartussat/Kommuni) atuutsinnejqassaaq. Immikkut suliniutaasussamut aningaasat tamakkiissumik atorneqarnerisigut kommuninut tamanut tamakkiissumik 2.4 mio.kr. aningaasartuuteqarnerulersitsisussaavoq.

Kommuninulli aningaasartutissat kommuninut naligiimmik agguaraanni immikkut suliniutaasup ilaaffignerani kommuni ataaseq 480.000kr. ukiumut aningaasartuuteqarsinnassaaq.

Immikkut suliniummut toqqaannanngitsumik pitsangorsaataasinnaasullu ilanngunneqanngillat.

Kisiannili immikkut suliniummut kommunit ilaasussat isumaginnittoqarfinni sulisuisa akisussaaffigisaannut annikillisaaqataasumik socialvagt- oqarasuaataanik unnukkullu unnuarsiorernut atugassaraluit immikkut suliniummi ilaankut annikillisaaqataaffigineqassapput. Immikkullu suliniuteqarnikkut meeqqat inuusuttullu sumiginnakkat piffinniittut annertusisamik isumaginninnikkut allaffissornikkullu ukkatarineqalersinnaaneri naatsorsuutigineqarsinnaavoq..

Allaffissornikku sunniutissaannut qanoq annertutigisinnaanissaanut isumaginnittoqarfinnut, atuarfinnut politiinullu sunniutissaat nalileruminaappoq.

§37 nr.2018-010<sup>3</sup>-mi akissutaasoq naapertorlugu immikkut suliniuteqarfiusuni anngaaasartuutaasinnaasuni periarfissat siunnersuusiariineqarsimapput ammaffigineqartussat siunnersuutaasut aallaavigalugit (uani immikkut aningaasartutissanik agguaaqatigiinnissaq ilanngunnagu) imatut isikkoqarput:

Periarfissaq 1: Ilanniagaqanngitsut marluk SIK malillugu akissarsiaqartitat 1,5 mio. kr.-nit missaannik akeqassapput.

Periarfissaq 2: Ilanniagaqanngitsut pingasut SIK malillugu akissarsiaqartitat 2,25 mio. kr.-nit missaannik akeqassapput.

Periarfissaq 3: Perorsaasut ilinniarsimasut marluk 2,33 mio. kr.-nit missaannik akeqassapput.

Periarfissaq 4: Perorsaasut ilinniarsimasut pingasut 3,49 mio. kr.-nit missaannik akeqassapput.

Taamaammat immikkut suliniuteqarniarlutik kommunit qinnuteqaataat aallavigilluinnarlugit tulluussaasinaassuseqarnerlu aallaavigalugu immikkut suliniutaasussaat aningaasartuutaasussallu aaqqissunneqarsinnaapput.

### **Namminersortunut aningaasaatigut allaffissornikkullu kingunerisassai:**

Soqanngilaq.

<sup>3</sup> [https://ina.gl/documents/para3637/2018/svar/010\\_2018\\_Unnuarissat\\_peol\\_akissut.pdf](https://ina.gl/documents/para3637/2018/svar/010_2018_Unnuarissat_peol_akissut.pdf)

**Innuttaasunut aningaasatigut allaffissornikkullu kingunerisassai:  
Soqanngilaq.**